

## ÁKVÖRDUN RÁÐSINS

frá 22. desember 1994

um rýmkun lögverndar svæðislýsinga smárása á hálfleiðurum þannig að hún nái til persóna frá aðila að Alþjóðaviðskiptastofnuninni(\*)

(94/824/EB)

### RÁÐ EVRÓPUSAMBANDSINS HEFUR,

með hliðsjón af stofnsáttmála Evrópubandalagsins,

með hliðsjón af tilskipun ráðsins 87/54/EBE frá 16. desember 1986 um vernd svæðislýsinga smárása á hálfleiðurum <sup>(1)</sup>, einkum 7. mgr. 3. gr.,

með hliðsjón af tillögu framkvæmdastjórnarinnar,

og að teknu tilliti til eftirfarandi:

Samningurinn um stofnun Alþjóðaviðskiptastofnunarinnar, hér á eftir nefndur WTO-samningurinn, hefur verið undirritaður af hálfu bandalagsins. Samningurinn um hugverkarétt í viðskiptum, hér á eftir nefndur TRIPs-samningurinn, sem fylgir með í viðauka við WTO-samninginn, hefur að geyma ítarleg ákvæði um verndun hugverkaréttinda sem hafa að markmiði að innleiða alþjóðlegar vinnureglur á þessu sviði til að efla alþjóðaviðskipti og koma í veg fyrir að skortur á fullnægjandi og skilvirkri verndun hugverkaréttinda leiði af sér röskun og hindranir í viðskiptum.

Til að tryggja að öll viðeigandi löggjöf bandalagsins sé í fullu samræmi við TRIPs-samninginn verður bandalagið að gera tiltekna ráðstafanir í tengslum við gildandi gerðir bandalagsins um verndun hugverkaréttinda. Þessar ráðstafanir felast í vissum tilvikum í breytingu eða aðlögun á gerðum bandalagsins. Þessar ráðstafanir geta einnig falist í viðbótum við gildandi gerðir bandalagsins.

Tilskipun 87/54/EBE varðar lögvernd svæðislýsinga smárása á hálfleiðurum. Ákvæði 35. til 38. gr. TRIPs-samningsins fjalla um skyldur aðila að Alþjóðaviðskiptastofnuninni með tilliti til verndar formhönnunar (svæðislýsinga) smárása. Samkvæmt 3. mgr. 1. gr. og 3. gr. TRIPs-samningsins verður bandalagið að sjá til þess að ríkisborgarar allra annarra aðila að Alþjóðaviðskiptastofnuninni njóti góðs af slíkri vernd og af innlendi meðferð. Af þeim sökum er nauðsynlegt að rýmka þá vernd sem kveðið er á um í tilskipun 87/54/EBE þannig að hún nái til ríkisborgara allra

aðila að Alþjóðaviðskiptastofnuninni, án þess að gerð sé krafa um gagnvirkni. Fullnægjandi er að beita málsmeðferð 7. mgr. 3. gr. tilskipunarinnar í þessu skyni.

### ÁKVEÐIÐ EFTIRFARANDI:

#### 1. gr.

Aðildarríkin skulu rýmka lögvernd svæðislýsinga smárása á hálfleiðurum sem kveðið er á um í tilskipun 87/54/EBE eins og hér greinir:

- einstaklingar, sem eru ríkisborgarar eða sem eiga lögheimili á yfirráðasvæði aðila að WTO-samningnum, skulu fá sömu meðferð og væru þeir ríkisborgarar aðildarríkis;
- lögaðilar eða einstaklingar, sem eru með raunverulegan atvinnurekstur í því skyni að búa til svæðislýsingar eða framleiða smárásir á yfirráðasvæði aðila að WTO-samningnum, skulu fá sömu meðferð og lögaðilar eða einstaklingar sem starfrækja raunveruleg iðnaðar- eða verslunarfyrirtæki á yfirráðasvæði aðildarríkis.

#### 2. gr.

- Ákvörðun þessi öðlast gildi 1. janúar 1995.
- Hún kemur til framkvæmda frá 1. janúar 1996.
- Ákvörðun ráðsins 90/510/EBE frá 9. október 1990 um aukna lögvernd fyrir svæðislýsingar smárása á hálfleiðurum til að ná til einstaklinga frá tilteknum löndum og yfirráðasvæðum <sup>(2)</sup> fellur úr gildi frá þeim degi er þessi ákvörðun kemur til framkvæmda, að svo miklu leyti sem hún varðar rýmkun þeirrar verndar sem kveðið er á um í tilskipun 87/54/EBE þannig að hún nái til landa eða yfirráðasvæða aðila að WTO-samningnum.

#### 3. gr.

Ákvörðun þessari er beint til aðildarríkjanna.

Gjört í Brussel 22. desember 1994.

Fyrir hönd ráðsins,

**H. SEEHOFER**

forseti.

(\*) Þessi EB-gerð, sem birtist í Stjtið. EB nr. L 349, 31. 12. 1994, bls. 201, var nefnd í ákvörðun sameiginlegu EES-nefndarinnar nr. 54/95 frá 22. júní 1995 um breytingu á XVII. viðauka (Hugverkaréttindi) við EES-samninginn, sjá þessa útgáfu af EES-viðbæti við Stjórnartíðindi Evrópubandalagsins.

<sup>(1)</sup> Stjtið. EB nr. L 24, 27. 1. 1987, bls. 36.

<sup>(2)</sup> Stjtið. EB nr. L 285, 17. 10. 1990, bls. 29. Ákvörðuninni var breytt með ákvörðun 93/17/EBE (Stjtið. EB nr. L 11, 19. 1. 1993, bls. 22).